



Här Fernand Etgen

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, de 6. Juni 2019

Här President,

Sou wéi d'Chambersreglement et virgesäit, bieden ech lech, dës parlamentaresch Fro un den Här Schoul- an Edukatiounsminister weiderzeleeden.

De Schoul- an Edukatiounsministère mécht eng gréisser Ëmfro bei den Eltere vu Kanner tëscht 8 an 12 Joer („Enquête sur le bien-être des enfants“). An där Prozedur sinn awer och Persounen ugeschriwwen ginn, déi weder bestuet sinn nach Kanner hunn. De Bréif vum Edukatiounsministère verzicht och drop, d'Adressaten ausféierlech iwwert hir Rechter a Saachen Dateschutz ze informéieren, obwuel an dësem Bréif d'Adress mat engem informatéschen Numm a Passwuert verknäppt gëtt. Aus dëse Grënn wëllt ech dës Froen un den Här Schoul- an Edukatiounsminister stellen:

1. Ass den Här Minister doriwwer informéiert, datt verschidden Adressate vu senger „Enquête sur le bien-être des enfants“ net d'Critèren erfëllen, fir dorunner deelzehuelen? Ass virgesinn, datt den Här Minister sech bei deene Leit déi als Elteren ugeschriwwen goufen awer iwwerhaupt keng Kanner hunn, entschëllegt? Wéi gouf d'Datebank fir d'Adressaten opgestallt a kontrolléiert? Huet de Ministère dat selwer gemaach oder war eng aner Instanz dofir zoustänneg?
2. Wéivill Leit si fir dës Enquête ugeschriwwen ginn?
3. Ass iwwerhaupt nozevollzéien, wéi vill falsch adresséiert Bréiwer erausgaange sinn a, wa jo, wéi vill waren et där? Et ass iwwerregens och virkomm, datt dee Bréif dräimol a verschiddenen Enveloppen un déi sëlwecht Persoun geschéckt gouf.
4. Wat sinn d'Uersaachen an de Käschtepunkt vun esou Pannen?
5. Wéi eng Precautiounen si geholl ginn fir den Dateschutz ze respektéieren?

Mat déiwem Respekt,

Fernand Kartheiser
Deputéierten



LE GOUVERNEMENT
DU GRAND-DUCHÉ DE LUXEMBOURG
Ministère de l'Éducation nationale,
de l'Enfance et de la Jeunesse

Luxembourg, le 24 juillet 2019

Monsieur le Président de la
Chambre des Députés
19, rue du Marché-aux-Herbes
L-1728 Luxembourg

Réponse commune de Monsieur le Ministre de l'Éducation nationale, de l'Enfance et de la Jeunesse et de Monsieur le Ministre délégué à la Digitalisation à la question parlementaire N° 763 de Monsieur le Député Fernand Kartheiser

Laut dem Artikel 15 aus dem Jugendgesetz soll de Minister all 5 Joer e „nationale Rapport iwwert d'Situatioun vun de Kanner zu Lëtzebuerg“ virun der Chamber deposéieren. Den éischte Rapport ass laut Gesetz 2021 fälleg. Esou wéi och am Jugendberäich, geet et am éischte Kannerbericht ëm d'Thema vum „Wuelbefanne vun de Kanner zu Lëtzebuerg“. An dësem Kontext huet den Educationnsminister de LISER („Luxembourg Institute of Socio-Economic Research“) beoptraagt, eng Etude iwwert d'Wuelbefanne vun de Kanner vun 8, 10 an 12 Joer zu Lëtzebuerg duerchzeféieren. Zil vun dëser Etude ass et, d'Kanner selwer zu Wuert kommen ze loossen iwwert en Online-Questionnaire. Fir datt d'Kanner bei de Froe kënne matmaachen, ass et noutwenneg, d'Autorisatioun vun den Elteren unzufroen.

Laut der Gesetzgebung huet nëmmen den CTIE (Centre des technologies de l'information de l'État) Accès op perséinlech Date vun de Leit (Numm, Adress, asw.) an ass dofir zoustänneg fir d'Verschécke vun dem Bréif, deem un d'Eltere vun de Kanner vun 8, 10 an 12 Joer hätt solle goen.

Wat den Oflaf vun der Enquête iwwer d'Wuelbefanne vun de Kanner ugeet, do sief präziséiert, dass den CTIE zur selwechter Zäit mat zwou Enquêtë vum Ministère fir Education, Kanner a Jugend befaasst war.

Duerch e Feeler beim Envoi vun de Bréiwer, en Envoi, deem aus technesche Grënn an 3 Tranchë gemaach ginn ass, sinn net d'Eltere vun de Kanner vun 8, 10 an 12 Joer ugeschriwwen ginn, mee Jugendlecher, déi am Kontext vun enger anerer Enquête iwwert de „Youth Survey Luxembourg“ hätte sollen en anere Bréif kréien. De CTIE huet sech formell bei de betraffene Jugendleche per Schreiwes entschëllegt.

Et goufen insgesamt 23.955 Bréiwer u falsch Adressate geschéckt. De Käschtepunkt beleeft sech op d'Käschte vum Pabéier, Enveloppen an den Timbrage.

Et ass och wichteg ze ënnersträichen, dass zu kengem Zäitpunkt privat Donnéeën vun de Bierger un den Demandeur vun der Enquête oder u soss eng Drëttpersoun geschéckt gi sinn.

Claude Meisch
Ministre de l'Éducation nationale, de l'Enfance et de la Jeunesse